

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN RAMLI BIN DATO' MOHD NOR
[CAMERON HIGHLANDS]**

TARIKH : 10 JULAI 2019 (RABU)

SOALAN NO. 16

Minta **PERDANA MENTERI** menyatakan :

(a) Sudahkah kementerian menyediakan Pelan Pembangunan Masyarakat Orang Asli Nasional yang menyeluruh untuk menangani isu utama masalah Masyarakat Orang Asli di negara ini sebagaimana di war-war di dalam akhbar semasa Konvensyen Orang Asli 2019 di Putrajaya pada bulan April lalu; dan

(b) Siapakah yang diamanahkan untuk melaksanakan tugas merangka Pelan Pembangunan Masyarakat Orang Asli Nasional ini dan jangkamasa yang ditetapkan untuk menjayakan Pelan Pembangunan Masyarakat Orang Asli Nasional.

**JAWAPAN : YB DATUK LIEW VUI KEONG
MENTERI DI JABATAN PERDANA MENTERI
(UNDANG-UNDANG & HAL EHWAL PARLIMEN)**

Tuan Yang di-Pertua,

(a) Pihak JAKOA dalam proses penyediaan Pelan Pembangunan Masyarakat Orang Asli Nasional berdasarkan aspirasi masyarakat Orang Asli. Input bagi penyediaan Pelan ini adalah dengan mengambil kira hasil resolusi yang dicapai menerusi Konvensyen Orang Asli Kebangsaan

NO. SOALAN : 16

2019 yang telah dianjurkan pada 22 April 2019 di Pusat Konvensyen Antarabangsa Putrajaya (PICC). Sebanyak 137 resolusi yang dibahagikan kepada 7 tema iaitu tanah, pendidikan, kepimpinan, kesihatan, ekonomi, infrastruktur dan kebudayaan telah dicapai. Resolusi daripada konvensyen ini akan dijadikan sebagai asas kepada penggubalan Pelan Pembangunan Orang Asli Nasional agar selari dengan keperluan masyarakat Orang Asli.

Langkah seterusnya pada 1 Julai 2019, akan diadakan sesi konsultasi bersama NGO, SUHAKAM dan Majlis Peguam bagi memperincikan 137 resolusi kepada Pelan Tindakan bagi penggubalan Pelan Pembangunan Orang Asli Nasional. Manakala pada 3 September 2019, JAKOA merancang untuk mengadakan sesi konsultasi kedua yang melibatkan agensi-agensi Kerajaan Persekutuan dan Negeri. Pihak JAKOA juga merancang untuk mengadakan sesi konsultasi dengan rakan-rakan sinergi iaitu badan-badan korporat yang mempunyai dana bagi membiayai aktiviti-aktiviti di bawah Pelan Tindakan yang sedang dibentuk. Sesi konsultasi terakhir, pihak JAKOA akan mendapatkan maklumbalas daripada wakil masyarakat Orang Asli yang terdiri daripada Pemimpin Orang Asli (Tok Batin & MPKKOA), Profesional Orang Asli, Belia Orang Asli dan Wanita Orang Asli sebelum Pelan Pembangunan Orang Asli Nasional diangkat untuk kelulusan Jemaah Menteri.

(b) JAKOA merupakan jabatan yang bertanggungjawab untuk menyediakan Pelan Pembangunan Masyarakat Orang Asli Nasional. Penyediaan dan pelaksanaan Pelan Tindakan ini akan turut mengambil kira input serta maklumbalas daripada wakil masyarakat Orang Asli, agensi Kerajaan, ahli akademik, pihak badan bukan kerajaan dan badan korporat yang berkaitan. Pihak JAKOA menetapkan Pelan Pembangunan Masyarakat Orang Asli Nasional ini dapat dilaksanakan dalam tempoh RMKe-12 (2021-2025)

Sekian, terima kasih.